

**Kadhannaa Keessatti Abdii Macaafa Qulqulluu kan ofii Godhachuu****Abdii Hafuura Qulqulluu**

“Bokkaa ji'a birraa akka isiniif kennuuf Waaqayyoon kadhadaa! Isatu duumessa bokkaa qabuu fi bokkaa tiifuu namootaaf ergee, wanta hundumaaf, lafti biqiltuu biqilchee akka lalisu godhe.” Zaka.10:1.

“Egaa isin hamoota taatanii utuu jirtanii, ijoollee keessaniif kennaa gaarii kennuu erga beektanii, abbaan keessan inni waaqa irraa immoo, hammam isin caalaa warra isa kadhataaniif hafuura qulqulluu kenna! jedhe.” Luq.11:13,

“Inni isiniif dubbatu hafuurri qulqulluun, inni abbaan maqaa kootiin ergu garuu, waan hundumaa isin in barsiisa, waanan isinitti hime hundumaas isin in yaadachiisa... Inni yommuu dhufu waa'ee cubbuu, waa'ee qajeelummaa, waa'ee firdiis, biyya lafaa in hubachiisa.” Yoh. 14:26; 16:8

“Dhuguma, dhuguman isiniin jedha, namni anatti amanu waan ani hojjedhu hundumaas in hojjeta; ani gara abbaa waanan dhaquuf kana irra kan caalu iyyuu in hojjeta. Abbaan ilma isaatiin ulfina akka argatutti, waanuma isin maqaa kootiin kadhattan ani nan raawwadha. Waanuma tokko isin maqaa kootiin yoo kadhattan, ani nan raawwadha jedheen.” Yoh.14:12-14

“Yommuus ergamichi, ergaa isa Waaqayyo biraa dhufee Zarubaabelitti akka ani dubbadhuuf anatti in hime; ergichis, Hafuura kootiin malee humnaan miti, aangoodhaanis miti kan jedhu ture; kana Waaqayyo gooftaa maccaatu dubbate.” Zak.4:6.

**Abdii Waaqayyo kadhannaa Deebisuu Isaa**

“Isin anatti qabattanii yoo jiraatan, dubbiin koos isin keessa yoo jiraate, waan feetan in kadhattu, isiniif in ta'as.” Yoh.15:7.

“Yeroo barbaachisetti akka nu gargaaraniif araara isaa fudhachuudhaaf, ayyaan isaas argachuudhaaf, kottaa ija-jabinaan gara teessoo Waaqayyoo isa ayyaanaan guututti in dhi'aannaa.” Ibr.4:16.

“Kanaaf isinittan hima! waan kadhattan waan gaafattanis hundumaa akka waan fudhataniitti lakkaa'aa amanaa, isiniif ta'uufis jira!” Mar.11:24.

“Guyyaa rakkinaatti na waammadhu, ani isa keessaa butee sin baasa, ati immoo ulfina anaaf in laatta in jedha.” Far.50:15.

“Ammas isiniin nan jedha; isin keessaa namoonni lama biyya lafaa kana irratti waa'ee waan tokkootti walii galanii yoo kadhattan, abbaa koo isa waaqa irraa biraa wanti isaan kadhattan in kennamaaf.” Mat.18:19.

“Amantanii kadhataan waan dhi'eeffattan hundumaa in fudhattu isaaniin jedhe.” Mat.21:22.

“Abbaan ilma isaatiin ulfina akka argatutti, waanuma isin maqaa kootiin kadhattan ani nan raawwadha. Waanuma tokko isin maqaa kootiin yoo kadhattan, ani nan raawwadha jedheen.” Yoh.14:13, 14.

“Gaafas isin homaa ana hin gaafattan; dhuguma, dhuguman isinitti hima, waanuma isin maqaa kootiin isa kadhattan abbaan isiniif in kenna. Hamma ammaatti isin maqaa kootiin waan tokko illee hin kadhanne; egaa gammachuun keessan guutuu akka ta'uuf kadhadaa, in fudhattus! isaaniin jedhe.” Yoh.16:23, 24.

“Akka fedha isaatti yoo isa kadhanne inni nuuf in dhaga'a; akka kanatti isa in amananna. Kadhata keenya akka inni nuuf dhaga'u yoo beekne, waan kadhanne akka isa biraa argannus in beekna.” 1 Yoh.5:14, 15.

### **Abdii Waa'ee Humna Waaqayyoo**

“Wanti dinqisiisaan Waaqayyoo gochuu dadhabu jiraa ree? Bara eger yowwana deebi'ee gara kee nan dhufa, Saaraanis ilma godhattee na eegdi jedhe.” Uum.18:14

“Amma Waaqayyoo isiniif in lola, isin gabii argadhaa! jedhe.” Ba'uu 14:14.

“Ati waan hundumaa gochuu akka dandeessu nan beeka, akeeka kees karaatti kan hambisu hin jiru.” Iyooob 42:2.

“Kana hundumaa irratti Waaqayyoo gara keenya erga ta'ee, eenyutu nu irratti ka'a jenna ree? Waaqayyoo ilma isaa utuu hin mararsiifatin hunduma keenyaaf dabarsee erga kennee, waan hundumaas immoo ilma isaa wajjin tola nuuf hin kennuu ree?” Rom.8:31, 32.

“Waaqayyoo akka namaa miti, inni hin sobu, gaabbuudhaafis inni ilma namaa miti, inni wanta jedhe hin godhuu ree? Wanta dubbates hin raawwatuu ree?” S/Lakk. 23:19

“Ati hin beeknee ree? Hin dhageenyeessii ree? Waaqayyoo, gooftaa bara baraan jiraatuu dha, inni isa guutummaa biyya lafaa uumee dha; inni hin mudhuku, hin dadhabu, hubannaa isaas namni qoree bira hin ga'u; inni warra dadhabaniif humna in kenna, warra aangoo hin qabneefis jabina in kenna; ijoollonni in dadhabu, in mudhukus, dargaggoonnis gufatanii in kufu; warri Waaqayyoon abdiidhaan eeggatan garuu humni isaanii in haareffama; akka joobiraas baalleedhaan” Isa. 40:28-31.

### **Abdii Geggeessaa Waaqayyoo**

“Ani Waaqayyoo gooftaan kee, 'Iddoo ati dhaqxu hundumaatti sii wajjinan jiraatii ati cimi, ija jabaadhu, hin sodaatin, hin na'inis!' jedhee si hin abboomnee ree? jedhe.” Iyaasu.1:9.

“Kunoo, ani sii wajjinan jira, iddoo ati dhaqxu hundumaatti sin eega; biyya kanatti sin deebisa, waan ani sitti dubbadhe siifan raawwadha malee, si hin gatu! jedhe.” Uma.28:15.

“Kunoo, ani karaa irratti akka si eeguuf, iddoo ani qopheessettis akka si geessuuf ergamaa si dura nan erga.” Ba'u 23:20.

“Garuu achitti Waaqayyoon gooftaa keessan in barbaaddattu; isin garaa keessan guutuudhaan, yaada keessan guutuudhaanis yoo isa barbaaddattan isa in argattu!” Kes.4:29.

“Inni, Na kadhada! Anis siif nan dhaga'a; wanta guddaa ati qortee bira ga'uu hin dandeenye sitti nan hima.” Erm.33:3.

“Dachaan hundinuu ol haa kaafamu, tulluun, gaarris hundinuu haa kuffifamu! Inni bu'aa-ba'iin diriiraa haa ta'u, inni wal caccaalaanis wal haa qiqixxaatu! Yommus ulfinni Waaqayyoo in mul'ata, Waaqayyo ofii isaatii kana waan dubbateef, namni hundinuu kana arguuf jira in jedha.” Isa.40:4, 5.

“Waaqayyo, "Waan gochuun siif ta'u sin hubachiisa, karaa irra adeemuun siif ta'u sittan argisiisa; sin gorsa, ija kootiinis sin to'adha.” Far.32:8.

“Waaqayyo si dura ni deema; yeroo hundumaas sii wajjin ni taa.l Inni si hin dhiisu, si hin gatus. Hin sodaatin yookiin hin jeeqamin.” kes.31:8

“Namni Waaqayyoon sodaatu eenyu? Waaqayyo waaee daandii inni filachuu qabuu isa ni barsiisa.e...Far.25:12

“Garaa kee guutuu Waaqayyoon amanadhu, hubannaa ofii keetiitti hin hirkatin! Karaa kee hundumaatti isa yaadi, innis daandii kee siif in qajeelcha.” Fakk.3:5, 6.

“Isa beela'eef nyaata yoo kennitan, isa rakkates yoo gargaartan, ifni keessan dukkana keessatti in ba'a, dukkanni keessanis akka guyyaa saafaa in ta'a. Ani Waaqayyo yeroo hundaa isin nan geggeessa, lafa gogaa keessatti iyyuu isin nan quufsa, namummaa keessanis nan jabeessa; yommus isin akka iddoo dhaabaa isa yeroo hundaa bishaan qabuu, akka burqaa bishaan isaa hin hir'annees in taatu;” Isa.58:10, 11.

“Yommus utuu isaan ana hin kadhatin nan deebisaaf; utuma isaan anatti himatanii hin fixinis nan dhaga'aaf.” Isa. 65:24.

### **Abdii onnee Jijjiiramee**

“Ani garaa isaan ittiin ani Waaqayyo akkan ta'e beekan isaaniif nan kenna; garaa guutuudhaan gara kootti in deebi'u; ani Waaqayyo isaaniif nan ta'a, isaanis saba koo in ta'u jedhe.” Erm.24:7.

“Waaqayyo Waaqni kee garaa kee fi garaa sanyii keetii ni qulqulleessa.” Kes. 30:6

“Ani garaa haaraa isiniif nan kenna, hafuura haaraas isin keessa nan kaa'a; ani garaa isa akka dhagaa sana isin keessaa nan baasa, garaa isa akka fooniis isiniif nan kenna;” Hisq.36:26.

“Waaqayyo inni hojii gaarii isin keessatti jalqabe, hamma guyyaa Kristos Yesus deebi'ee dhufutti, fiixaan akka baasu nan amanadha.” Fili.1:6.

“Kanaafis namni kan Kristos yoo ta'e, uumama haaraa dha; inni moofaan darbe, kunoo, inni haaraan dhufeera.” 2Qor.5:17.

“Egaa si'achi Kristos isa ana keessaatu jiraata malee, anatu jiraata miti; jireenya ani amma fooniin jiraadhu immoo, ilma Waaqayyoo isa na jaallate, ofii isaas dabarsee isa anaaf kennetti amanuudhaan nan jiraadha.” Gal.2:20.

“Waaqayyo inni nagaa namaaf kennu guutummaatti ofii isaatiif isin haa qulqulleessu; yeroo dhufa gooftaa keenyaa Yesus Kristosittis hafuura keessan, lubbuu keessan, foon keessanis fayyaatti mudaa akka hin godhannettis haa eegu! Inni isin waame amanamaa waan ta'eef, kana in godha.” 1Tasa.5:23, 24.

**Abdii Dhiifamaa**

“Sabni koo warri dhuunfaa koo ta'an kun gad of deebisanii ana barbaaddatanii, karaa isaanii isa hamaa irraa deebi'anii, yoo na kadhatan, ani waaqa irraa isaaniif nan dhaga'a, cubbuu isaanii isaaniif nan dhiisa, biyya isaaniis nan fayyisa.” 2Sen. 7:14.

“Yaa gooftaa, ati gaarii dha, jaalala keetiinis namaaf cubbuu isaa in dhiifta, warra si waammatan hundumaafis gaarummaan kee in baay'ata.”

“Kadhachuuf yommuu dhaabattan, abbaan keessan inni waaqa irraa yakka keessan akka isiniif dhiisutti, nanmi tokko waa isinitti yakkee yaada keessan miidheera yoo ta'e dhiisaaf!” Mar.11:25.

“Walitti kan toltan, garaas kan waliif laaftan ta'aa; akkuma Waaqayyo karaa Kristos cubbuu keessan isiniif dhiise, isinis akkasuma waliif dhiisaa!” Efe.4:32.

“Cubbuu keenya yoo isatti himanne, inni amanamaa fi qajeelaa waan ta'eef, cubbuu keenya nuuf in dhiisa, jal'ina keenya hundumaattiis nu qulleessa.” 1Yoh.1:9'

“Kottaa mee walii wajjin dhugaa in baafnaa cubbuun keessan akka dhiigaa yoo isin diimesse iyyuu, akka cabbii in addaattu; diimaa biluus yoo isin godhe iyyuu, akka jirbii iddamaa adii in taatu.” Isa.1:18.

“Ana, anumatu ofuma kootiif jedhee, irra-daddarbaa kee siif balleessa; cubbuu kees deebi'ee hin yaadadhu,” Isa 43:25

“Ani yakka isaanii isaaniif nan dhiisa, cubbuu isaaniis deebi'ee isaanitti hin lakkaa'u,” Erm.31:34.

“Akka inni ifa keessa jiru, nuyis ifa keessa yoo deddeebine, nuyi walii keenyaa wajjin tokkummaa qabna, dhiigni ilma isaa Yesus immoo cubbuu hundumaattii nu qulleessa.” Efe.1:7.

**Abdii cubbuu irratti mo'icha argachuu**

“Sababii namni mucaa Waaqayyoo ta'e hundinuu biyya lafaa mo'uuf, ba'aa ulfaatoo itti hin ta'an; humni ittiin biyyi lafaa mo' amu kunis amantii keenya.” 1Yoh.5:4.

“Waan nu irra ga'e hundumaatti garuu, karaa isa nu jaallatee mo'icha guddaa arganna.” Rom.8:37.

“Waaqayyo isa karaa gooftaa keenya Yesus Kristos mo'icha nuuf kennuuf immoo galanni haa ta'u.” 1Qor.15:57.

“Egaa ani sii wajjin waanan jiruuf hin sodaatin! Ani Waaqayyo kee ti hin na'in! Ani sin jabeessa, ani sin gargaaras; irree qajeelummaa koo isa mirgaatiin ol sin qaba.” Isa.41:10.

“Kana hundumaa irrattis amantii akka gaachanaatti fudhadhaa! Isaan xiyya isa hamaa sanaa warra boba'aa adeeman dhaamsuu in dandeessu.” Efe.6:16.

“Egaa si'achi Kristos isa ana keessaatu jiraata malee, anatu jiraata miti; jireenya ani amma fooniin jiraadhu immoo, ilma Waaqayyoo isa na jaallate, ofii isaas dabarsee isa anaaf kennetti amanuudhaan nan jiraadha.” Gal.2:20.

“Waaqayyo akka akeeka isaa isa gaariitti hojjechuudhaaf fedha akka qabaattaniif, akka hojjettaniif isin gidduutti in hojjeta.” Fili.2:13.

“Ani garuu, Hafuuraan geggeeffamaa jiraadhaa malee, fedha foonii hin raawwatinaa! nan jedha.” Gal.5:16

“Waaqayyo inni nagaa kennu immoo dafee Seexana miilla keessan jalatti in caccabsa; ayyaanni gooftaa keenya Yesus isinii wajjin haa ta'u!” Rom.16:20.

“Fakkeenya jireenya bara isa darbu kanaa duukaa hin bu'inaa! Jaalalli Waaqayyoo isa kam akka ta'e gargar baasuudhaaf, yaada garaa keessanii haareffachuudhaan of diddiiraa! Jaalalli Waaqayyoo immoo waan gaarii ta'e, waan isa duratti fudhatamaa ta'e, waan akeeka isaa fiixaan baasus hubachuu dha.” Rom.12:2.

“Biyya lafaa yookiis waan biyya lafaa jaallachuutti hin hidhaminaa; namni tokko biyya lafaa jaallachuutti yoo hidhame, Waaqayyo abbaa jaallachuun isa keessa hin jiru.” 1 Yoh.2:15.

### **Abdii Fayyisuu**

“Sagalee ana Waaqayyo gooftaa kee isa sitti dubbatu dhugumaan yoo dhaggeeffatte, wanta ana duratti qajeelaa ta'e yoo goote, abboommii koo yoo dhageesse, seerrata koo hundumaas yoo eegde, dhukkuba ani warra Gibxiitti fide hundumaa keessaa tokko illee sitti hin fidu; ani Waaqayyo fayyisaa kee ti jedhe.” Ba'u 15:26.

“Cufaan karra keetii sibiilaa fi sibiila diimaa dha;g Umurii kee guutuus tasgabbii ni qabaatta.” Kes.33:25

“Waaqayyoon ulfinaan jajadhu, yaa lubbuu ko, wanta gaarii inni godhe hundumaas hin irraanfatin! Inni yakka kee siif in dhiisa, dhukkuba kee hundumaattiis si fayyisa; Jireenya kee awwaalamuu in oolcha, gaarummaa fi oo'a si gonfa; inni jireenya kee waan gaariidhaan in quufsa, dargaggummaan kees haara'ee akka joobiraa in taata.” Far.103:2-5.

“Ani ogummaa qaba ofiin hin jedhin; Waaqayyoon sodaadhu, wanta hamaattiis fagaadhu! Kun fayyaa dhagna keetiif, cimina lafee keetiifis in ta'a.” Fakk.3:7, 8.

“Namoonni isa tuffatanii isa irraa in goran, inni nama dhiphinnii fi muddamni itti baay'ate ture; inni akka nama tuffatanii, achi ilaalanii bira darbanii in ta'e; nuyis homaatti iyyuu isa hin lakkoofne. Inni garuu dhugumaan dhiphina keenya of irra in kaa'e, muddama keenyas in baate; nuyi garuu akka waan Waaqayyo dha'icha isatti fidee, akka waan inni isa rukutee gad isa deebisettis in lakkoofne. Inni garuu balleessaa keenyaaf in waraaname, sababii yakka keenyaafis reebamee in caccabsame; nuyi nagaa akka argannuuf inni in adabame, madaa'uu isaatiinis fayyinni nuuf in argame;” Isa.53:3-5.

“Yaa Waaqayyo, ati jajannaa koo ti'o, na fayyisi, yommus ani nan fayya; ati na oolchi, yommus ani nan oola.” Erm.17:14.

“Diinonni keessan, 'Isin Xiyyoon ishee gatamte, ishee namni dhimma ishee hin qabnee dha' yoo isiniin jedhan iyyuu, ani immoo madaa keessan nan fayyisa, gogaa haaraas isa irratti nan biqilcha;” Erm.30:17

“Haa ta'u iyyuu malee, waanan ittiin ishee fayyisu ergee ishee nan oolcha; namoota ishee fayyisee isaanis nagaa guddaa argatanii, bir'aa malee gammachuutti akka jiraatan nan godha.” Erm.33:6.

“Isin warra maqaa koo sodaattaniif garuu aduun qajeelummaa inni qarri isaa fayyina of keessaa qabu isiniif in ba'a; akka jabbii goorana keessaa ba'ees gad baatanii in burraaqxu;” Milk.4:2.

“Isin keessaa namni dhukkubsate jiraa? Inni jaarsolii waldaa kristiyaanaa haa waamsifatu; isaan immoo maqaa gooftaatiin dibata dibanii kadhata haa godhaniif. Kadhanni amantiidhaan godhamu kun, isa dhukkubsataa in fayyisa; gooftaan isa in kaasa, cubbuu hojjeteera yoo ta'es in dhiisaaf.” Yaaq.5:14, 15.

### **Fedha waaqayyoo gochuuf Abdii Jabinaa**

“Kanaafis nuyi matumaa abdii hin kutannu, namummaan keenya inni bakkeetti mul'atu gad dhumaa yoo adeeme iyyuu, namummaan keenya inni keessaa har'aa bor haara'aa in adeema. Rakinni salphaan inni nuyi yeroodhaaf baannu kun, ulfina bara baraa isa safara malee guddaa sana baachuudhaaf nu qopheessa. Nuyi gara wanta ijaan hin argamnee ilaalla amalee, gara wanta ijaan argamuu hin ilaallu; wanti ijaan argamu yeroodhumaaf ta'a, wanti ijaan hin argamne garuu kan bara baraa ti.” 2 Qor.4:16-18.

“Yeroo isaatti humna utuu hin dhabin galfachuuf waan jirruuf, ammas kottaa wanta gaarii ta'e gochuutti hin laafnu!” Gal.6:9.

“Jabina gooftaan anaaf kennuun waan hundumaa gochuu nan danda'a.” Filip.4:13.

“Waaqayyo akka akeeka isaa isa gaariitti hojjechuudhaaf fedha akka qabaattaniif, akka hojjettaniif isin gidduutti in hojjeta.” Filip.2:13.

“Inni garuu, Ayyaanni koo si ga'a, humni koo dadhabaa keessaan akeeka isaa in raawwata naan jedhe. Humni Kristos ana bira akka buufatuuf, dadhabaa ta'uu kootiin hundumaa irra caalchisee gammachuudhaan of nan jaja.” 2 Qor.12:9.

### **Abdii Waa'ee dhuga Baatuu Waaqayyoo ta'uu**

“Hin sodaatinaa, hin na'inaas! Ani kana isinitti hin himnee ree? Duraan dursees isinitti hin mul'ifnee ree? Egaa isin anaaf dhuga-baatota; ana malee Waaqayyo kan biraa jiraa ree? Anoo kanan hin beekne hin jiru, Waaqayyo inni kattaa jabaan ana malee kan biraa jiraa ree? Jedhe” Isa.48:8

“Ifni kee dhufeera, ulfinni Waaqayyoos siif ba'eera, kanaafis ka'ii ibsi!” Isa.60:1

“Kun hundumtuu Waaqayyo isa karaa Kristos ofitti nu araarse biraa ta'e; inni hojii araarsuu isaa kanas namootatti akka dabarsinuuf nuuf kenne.” 2 Qor.5:18.

“Waaqayyo ammas anatti dubbatee, "Gara ani itti si ergu hundumaa dhaqi, wanta ani si abboomu hundumaas godhi malee, 'Ani mucaa dha' hin jedhin.” Erm.1:7.

“Isin garuu, hafuurri qulqulluun yommuu isin irra bu'u, humna in godhattu; Yerusaaletti, Yihudaa hundumaatti, Samaariyaatti, hamma andaara lafaattis dhuga-baatuu koo in taatu isaaniin jedhe.” H/Erg.1:8.

“Isin garuu qomoo fo'amaa dha, luboota mana mootummaa ti, saba qulqullaa'aa dha, warra dhuunfaa Waaqayyoo ta'anii dha. Waaqayyo hojii isaa isa jajamaa akka labsitaniif dukkana keessaa, gara ifa isaa isa dinqisiisaatti isin waame.” 1 Phex.2:9.

“Kristosiif garuu akka gooftaatti garaa keessan keessatti ulfina addaan ba'e kennaaf! Waa'ee abdii isin keessa jiruuf, nama isin gaafatee, deebii isin irraa barbaaduuf, deebii ga'u deebisuudhaaf yeroo hundumaa qophaa'oo ta'aa!” 1 Phex.3:15.